



FOTO R. FEINER/52BESTEBAUTEN.CH

Bulieus da betun bregagliots

■ (ls/fmr) La «Stazione di servizio» (1962/1963) sper la via chantunala a Castasegna è fin oz il pli extravagant tancadi dal Grischun ed in resultat da la mobilisaziun da massa tras l'auto dals onns tschuncanta e sessanta. Il focus creativ da l'architect tessinois *Peppo Brivio* è mess sin ils tetgs elegants-allegghers en

furma conica che dattan (u devan) susta als indrizs da tancar.

Encunter sutvart paran ils «bulieus», malgrà prest 11 meters diameter, da ballantschar sin in cilinder satigl e da resister a las forzas da gravitaziun. La purezza formala vegn anc sutlingiada cun blut betun che sveglia immediat l'attenziun dals auto-

mobilsts cun pauc (u er blier) benzin en lur tanc.

La «Stazione di servizio» a Castasegna è in da 52 edifizis che la Lia grischuna per la protecciun da la patria preschenta en il decurs da quest onn per sensibilisar per edifizis grischuns da valur culturala, bajetgs construids en ils onns 1950–2000.